


TEZAU LITURGIC
23 FEBRUARIE

SLUJBA
SF. CUVIOS
POLICARP
DE LA
BRIANSK



MINEIUL PE FEBRUARIE
MOSCOVA



Месяца февраля в 23-й день

Преподобнаго Поликарпа

Брянскаго

На велицей вечерни

На Господи, воззвах: стихиры на 8, глас 5.

Подобен: Радуйся, Живоносный Кресте:

Приспе светлая память/ преподобнаго отца
нашего Поликарпа,/ да празднуем убо, братие,
воспевающе того,/ яко отечества нашего славу,/
земли Брянской украшение,/ иноком мудраго
наставника,/ печальным милостиваго
утешителя,/ болящим скорога целителя/ и всем
верным теплаго молитвенника.

Преподобне отче Поликарпе,/ угодниче
Христов усердный,/ ты, безмолвия взыскуя,/ от
мирскаго мятежа изшел еси/ и, ангельский
образ восприем,/ обитель иноком во граде
Брянске основал еси./ Ныне, во обителях

Небесных с лики святых водворяяся,/ моли
спастися душам нашим.

Радуйся, преподобне Поликарпе,/ отче наш
богомудрый,/ кротости и смирения образе,/
незлобия и терпения учителю,/ общаго
иноческаго жития рачителю,/ милости
источниче, оружниче Царя Небеснаго,/ Емуже
молися/ отечеству нашему победы на враги
даровати/ и душам нашим велию милость.

Слава, **глас 8:**

Преподобне отче Поликарпе,/ во всеоружие
Божие облекся,/ миру и страstem себе
умертвил еси/ и, трудолюбне подвизаяся,/
иноков множество ко Христу привел еси,/ Егоже
моли грехов оставление даровати/ чтущим
любовию святую память твою.

И ныне, Богородичен.

Вход. Прокимен дне. Чтения три
преподобническая.

На литии стихиры, глас 2:

Преподобне отче Поликарпе,/ ты,
премудрости Божественныя измлада рачитель
быв,/ в напастех мирских перст Божий
уразумел еси/ и, совершен хотя быти,/
привременная блага оставил еси,/ евангельски
же Христу последовав,/ постом, бдением и
молитвами Тому угодил еси/ и Небесных благ
сподобился еси.

Слава, глас 6:

Божиим Духом подвизаемь,/ обитель Спасу
Христу воздвигл еси,/ блаженне Поликарпе,/ и
многия ученики, житию твоему ревнующия,
собрал еси,/ душу же твою, воздержанием
крепким/ и слезными токи очистив,/ в жилище
Святых Троицы уготовал еси,/ Юже моли
спастися душам нашим.

И ныне, Богородичен

Возвеличим вси Пренепорочную Матерь Бога нашего,/ Юже освяти Дух Пресвятый,/ и со умилением Той возопиим:/ о, Пречистая Дево Богородице,/ Оружие наше и Стено/ и отечества нашего Заступнице,/ избави от бед рабы Твоя/ и спаси души наша.

На стиховне стихиры, глас 2.

Подобен: ДOME Евфрафов:

В славнем граде Брянске/ верою Православною/ и подвиги иноческими/ просиял еси, отче Поликарпе,/ молитвенниче о душах наших.

Стих: Честна пред Господем/ смерть преподобных Его.

Блаженне отче Поликарпе,/ иноческими труды твоими/ благодать чудес восприял еси,/ недуги исцеляти/ и прошения наша исполняти.

Стих: Блажен муж, бояйся Господа,/ в заповедех Его восхощет зело.

Преподобне отче Поликарпе,/ приими пение
чад твоих/ и подаждь нам крепость и силу/ на
невидимыя и видимыя враги наша/
благодатными твоими к Богу молитвами.

Слава, глас и подобен тойже:

Дом добродетелей быв,/ привременная блага
отринул еси,/ отче преподобне Поликарпе,/ и, в
храме Божии приметатися изволив,/ обители
Спаса Христа игумен мудрый явился еси.

И ныне, Богородичен, глас и подобен тойже:

Дево Мати Пречистая,/ предстоящи пред
Богом,/ моли о нас, **грешных,**/ с преподобным
Поликарпом,/ о спасении душ наших.

Тропарь, гла 1:

Ветрилом креста душевный корабль
окормив,/ житейская красная оставил еси/ и, от
мирскаго мятежа изшед,/ плотския похоти
воздержанием многим, отче, умертвил еси,/
пощением же и слезами, молитвами и песньми

непрестанно прилепаяся Богу,/ жилище
достойное Духа Пресвятаго показался еси./
Моли, Поликарпе преподобне, Христа Бога,/
оставление прегрешений даровати нам и велию
МИЛОСТЬ.

На утрени

По 1-м стихословии седален, глас 8:

Непрестанно исход от временнаго сего
жития помышляя и о усопших братиях
неустанно псаломский глас вознося, богоносне
отче Поликарпе, на молитвенней стражи
бодренно предстоял еси, темже и в час кончины
твоя бдяща обрете тя Христос Бог. Мы же о
тебе вопием: честна пред Господем смерть
преподобных Его.

Слава, и ныне, **Богородичен:**

Помышляю суд и испытания страшная,
трепещу и ужасаюся мук, и огня болезни, и

тьмы же и тартара. Увы, что сотворю? Студ како претерплю, егда книги разгнутся и деяния обличатся? Сего ради припадаю Ти, Богородице Пречистая: тогда предстани ми, нужды оныя изымаючи, Тебе бо имам прибежище, Владычице.

По 2-м стихословии седален, глас 4:

Тесным и прискорбным путем шествуя и злостраданиа кротко претерпевая, труды велия подъял еси и, о спасении ближних болезнуя, в Царствие Небесное узкими враты вшел еси, богомудре отче Поликарпе, верных утверждение, преподобных похвало и земли Брянския заступниче.

Слава, и ныне, **Богородичен:**

Стена непобедимая христианом еси, Богородице Дево, к Тебе бо прибегающе, невредами пребываем, и паки согрешающе, имамы Тя Молитвенницу. Темже, благодаряще,

вопием Ти: радуйся, Обрадованная, Господь с Тобою.

Величание:

Ублажаем тя,/ преподобне отче Поликарпе,/ и чтим святую память твою,/ наставниче монахов/ и

Псалом избранный: Терпя, потерпех Господа:

По полиелеи седален, глас 3:

Отложив земное попечение и от мирскаго мятежа изшед, евангельски Христу последовал еси, блаженне Поликарпе. Ныне же, с безплотными воинствы водворяяся, поминай нас, чтущих святую память твою, да радостно воспеваем Господа Человеколюбца, Даровавшего тебе благодать исцелений.

Слава, и ныне, Богородичен:

Небесная веселяхуся и земная с трепетом ужасахуся, егда Пречистый глас найде на Тя, Богородице, едино бо торжество обоим возсия,

егда Безплотный радость Тебе принесе. Темже со Ангелом Тебе вопием: радуйся, Обрадованная.

Степенна, 1-й антифон 4-го гласа.

Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Всякое дыхание: Евангелие от Матфеа, зачало 43.

По 50-м псалме стихира, глас 6:

Яко солнце раннее землю оживляет,/ тако образ подвигов твоих время постное услаждает,/ отче наш Поликарпе./ Молися, преподобне, Христу Богу,/ Церковь Русскую в Православии невредиму соблюсти,/ отечество наше миром оградити/ и спасти души наша.

Канон святаго, глас 8, егоже краегранесие:

Преподобнаго Поликарпа поем любовию.

Песнь 1

Ирмос: *Воду прошед, яко сушу,/ и египетскаго зла избежав,/ израильтянин*

вопяше:/ Избавителю и Богу нашему поим.

Просвети ми ум и озари моя чувства, Христе Боже, и согрешений мрак от души моея отгони, да воспую угодника Твоего, Поликарпа блаженнаго.

Ревность по Бозе от юности с благородием души сочетава, добродетельным житием море житейское преити тщался еси.

Егда суету мирскаго мятежа познал еси, отче Поликарпе, тогда мира сего красная Христа ради во уметы вменил еси.

Богородичен: Пренепорочная Отроковице, Богомати Владычице, призри на рабы Твоя и моли Сына Твоего от всяких бед избавити нас.

Песнь 3

Ирмос: Ты еси Утверждение/ притекающих к Тебе, Господи,/ Ты еси Свет омраченных,/ и поет Тя дух мой.

Отложив попечения суетная, преподобне

Поликарпе, цветы добродетелей благоухал еси.

Дар Божий земли Брянской явился еси, образом жития твоего и чудес дарованием благоверие утверждая.

О Царствии Небеснем непрестанно помышляя, вся земная оставил еси и над страстьми царствовал еси, богомудре.

Богородичен: Богоматерь Чистую воспоим, рождшую Свет неприступный, Иже весь мир просвещает зарями Своего Божества.

Седален, глас 8:

Скорый в бедах утешитель и в болезнях целитель, монахов наставник и всех верных покровитель, таже и уставов церковных усердный хранитель явился еси, преподобне отче Поликарпе, града Брянска похвало и отечества нашего славо и украшение.

Слава, и ныне, **Богородичен:**

Теплая Предстательнице и усердная

Заступнице, Упование христиан непостыдное, Стено и Покрове, и Пристанище прибегающих к Тебе, земных и Небесных Владычице, Сына Твоего и Бога нашего моли, даровати миру умирение, и спасение и велию милость.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Научен быв Божественным заповедем, якоже Ангел на земли преизяществовал еси плотию, молитвою и постом страсти греховныя обуздавая.

Алчуща и жаждуща Христовы правды зрим тя, преподобне Поликарпе, вольною нищетою дарования духовная стяжавшаго.

Гордаго змия послушанием и смирением попрах еси, блаженне, и чада духовная богоугождению научил еси.

Богородичен: О, Пречистая, души моя
страсти исцели и печали недоумения победи,
Яже Бога рождшая на спасение человеком.

Песнь 5

*Ирмос: Просвети нас повелении Твоими,
Господи,/ и мышцею Твоею высокою/ Твой мир
подаждь нам,/ Человеколюбче.*

Престолу Всещедраго Бога ныне предстоя,
отче Поликарпе, не престай молиться о нас и
отечестве нашем, еже в мире ему пребывати.

Отче преподобне Поликарпе, основателю и
первоначальниче Брянския обители Спаса
Христа, град твой поминай и возрождению
обители твоея пособствуй.

Ликостоянием Небесным причащаяся,
призри на немощныя и грешныя чада твоя,
исцеления душам и телесем даруя.

Богородичен: Избавителя и Спаса нашего
родила еси, Всенепорочная Дево, Сего убо моли

чтущим Тя прегрешений оставление даровати.

Песнь 6

Ирмос: *Ризу мне подаждь светлу,/ одеяйся светом, яко ризою,/ Многомилостиве Христе Боже наш.*

Крепкое заступление буди всем, притекающим к твоей помощи в недугех и печалех, преподобне отче Поликарпе, теплый наш молитвенниче.

Ангелом на земли подражая, молитву непрестанную Богу возносил еси и всего себе в жертву Ему приносил еси.

Ратоборец на видимыя и невидимыя враги буди нам и щит несокрушимый отечеству нашему, от бед и напастей его избавляя.

Богородичен: Призре Господь на смирение Твое, Пречистая, и Тобою посещение сотвори удалившимся от Него, яко Многомилостив.

Кондак, глас 4:

Долу влекущее мудрование умертвив / и
суету мирскую презрев, / Божественным
законом последовал еси / и образ благонравного
жития иноком явил еси. / Мы же, восхваляюще
подвиги твоя, / со умилением и верою вопием
ти: / преподобне отче Поликарпе, / моли Христа
Бога / спасти и просветити души наша.

Икос:

Преподобне отче Поликарпе, богоугодное
житие твое души верных возвышает и к
подражанию тебе подвизает: ты бо, обетов
иноческих изрядный хранитель быв, кротостию
злобу победил еси и, в скорбех упованием на
Бога терпение неистощимое явив, древнему
иерарху Смирнскому подобник изрядный
показался еси. Темже, восхваляюще честную
память твою, зовем ти: моли Христа Бога спасти
и просветити души наша.

Песнь 7

Ирмос: *Отроцы еврейстии в пеци/ попраша
пламень дерзновенно/ и на росу огонь
преложиша, вопиюще:/ благословен еси, Господи
Боже, во веки.*

Ангельскую ревность о спасении Богом
врученного ти словесного стада являя,
наставниче неусыпный, отче преподобне, волю
Пастыреначальника Христа творити научал еси.

Призри на нас, чад твоих, преподобне
Поликарпе, предстоящих твоему честному
образу, и подаждь отеческая твоя даяния, да
поем: благословен еси, Боже отец наших.

Оставив временная и избрав вечная, изволил
еси усердне хранить заповеди Господни и, яко
сотворивый и научивый, велий в Царствии
Небеснем нареклся еси.

Богородичен: Ева убо недугом преслушания
клятву всели, Ты же, Дево Богородице,

прозябением чревоношения Благословение
мирови изнесла еси.

Песнь 8

Ирмос: *Богоглаголивии отроцы, в пеци/ со
огнем пламень попирающе, пояху:/
благословите, дела Господня, Господа.*

Молим тя, преподобне Поликарпе, утоли
наша болезни и скорби, и в Православней вере
утверди, да превозносим Господа во веки.

Любве Божия пламенный рачителю, еже
питати чада твоя, напитай и нас пищею
духовною, да причастницы жизни вечныя
будем.

Юдоль плачевная томит нас, отвергших Духа
благодать, преподобне отче, обаче молитвами
твоими возвесели нас, кающихся Господу.

Богородичен: Безлетный из Тебе воплотися
боголепне, Егоже моли, Дево, страсти плоти моя
умертвити и оживити душу мою.

Песнь 9

Ирмос: Чистую славно почитим,/ людие,
Богородицу,/ огонь Божества приимшую во чреве
неопально,/ песньми величаем.

О, многого твоего дерзновения, имже ко
Владыце всех обогатился еси, отче преподобне, в
сердце Ему, якоже другу, собеседуя.

Вем, яко недоумет язык восхвалити тя по
достоянию, обаче от любви приносимыя тебе
похвалы сия приими, яко отец чадолюбивый.

Избави нас ходатайством твоим от мук
вечных, преподобне Поликарпе, и деснаго
стояния на Страшнем Суде сподоби.

Богородичен: Юже древле предвозвести
пророческое сословие, стамну, и жезл, и
скрижаль, и несекомую гору, Богородицу Деву,
вернии, да восхвалим.

Светилен:

Благолепною простотою удобренный, отче

Поликарпе, добродетелей небовосходными
крылы, яко мысленный орел, сетей князя мира
сего избега еси и от земныя обители к Небесней
востекл еси, отонудуже осиявай попечением
твоим град Брянск, и землю Русскую, и всех,
любовию тя почитающих.

Слава, и ныне, **Богородичен:**

Всю надежду спасения нашего на Тя
возлагаем, Богомати Неискусобрачная, и на
помощь присно Тя призываем: от напасти врага
и печали спаси нас, греховныя пленицы зол
наших разрешающи, и вечнаго огня исхити, да
Тя, Предстательницу рода нашего, присно
величаем.

На хвалитех стихиры, глас 1.

Подобен: Небесных чинов радование:

Равноангельным житием твоим / течение
добре совершая / и тело, изнуренное постом и
бдением, / непрестанно вериги тяжкими

сокрушая,/ в ничтоже подвиги твоя вменял еси,
отче Поликарпе./ Темже ты с любовью
ублажаем.

Смирение и кротость/ с твердостью духа
сочетаемая,/ беды от лжебратий и злых человек
поношения/ Христа ради претерпел еси,/
отраду изнемогающей души твоей/ в молитве у
преподобных лавры Печерския обретая.

В келлии убозей и ризах раздраных/
богатством добродетелей возсиял еси,
преподобне,/ себе самаго образ стаду твоему
подавая,/ благоуветливый же глас словес
твоих,/ силою духа и любовью растворенный,/ к
Богу сердца верных обращаше.

Течение скончая пощения твоего,/
преподобне отче Поликарпе, при празе
церковнем погребсти/ многотрудное тело твое
завещал еси,/ обаче весть Господь славящия Его
прославляти./ Темже и ты по кончине даром

чудес обогати.

Слава, глас 8. Подобен: *О, преславнаго чудесе:*

О, угодниче Божий,/ отче наш Поликарпе,/ града Брянска покровителю,/ и Русския земли заступниче,/ Православныя веры поборниче,/ верным утверждение и воином пособниче,/ Безплотных подражателю и преподобных сожителю,/ и всем страждущим помощниче,/ моли спастися душам нашим.

И ныне, Богородичен, глас и подобен тойже:

О, преславнаго чудесе!/ Небесе и земли Царица,/ от святых сродников наших умоляемая,/ донныне землю Русскую покрывает/ и лика Своего изображении милостивно обогащает./ О, Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь.

На Литургии

Блаженны от канона святого, песнь 3-я и 6-я, на 4. Прокимен, глас 7: Честна пред Господем смерть преподобных Его: Стих: Что воздам Господеви о всех, яже воздаде ми? Апостол к Галатам, зачало 213. Алилуиа, глас 6: Блажен муж, бояйся Господа, в заповедех Его восхощет зело. Стих: Сильно на земли будет семя его. Евангелие от Луки, зачало 24. Причастен: В память вечную будет праведник:

Текст службы утвержден на заседании Священного Синода 8 декабря 2020 года журнал № 99

